

## Morning Dogri (NSD) National News Bulletin 27-06-2024

आकाशवाणी

- राष्ट्रपति द्रौपदी मुर्मू होर अज्ज संसद दे सांझे इजलास गी संबोधत करगंन।
- सीबीआई दे इक दल नै नीट मतेयान दा पर्चा लीक होने सरबंधी मामले दी जांच लेई झारखंड दे हजारीबाग च ओयसिस स्कूल च छापा मारेआ।
- डीआरडीओ नै भारतीय नौसेना गी दरम्यानी दूरी तोड़ी मार करने आले एमआर-एमओसीआर राकेश साँपे।
- मेबाइल सेवा च बाद्धे लेई दूरसंचार सेवा प्रदान करने आलें दी जरूरतै गी पूरा करने लेई टैलीकॉम स्पैक्ट्रम दी निलामी होई।
- मर्दे दे आईसीसी क्रिकेट विश्व कप च त्रिनादाद दे ब्रायन लारा स्टेडियम च खेड्डे गोदे पैहले मैच च दक्खन अफ्रीका नै अफगानिस्तान गी 9 विकेटें कन्नै हराइयै फाइनल च प्रवेश कीता। दुआ सैमीफाइनल भारत ते इंग्लैंड बश्कार खेड्डेआ जाग।

<><><><><><>

### President Joint Session

राष्ट्रपति द्रौपदी मुर्मू होर अज्ज संसद दे दौनें सदनें गी सांझे तौर पर संबोधत करगंन। राष्ट्रपति हुंदे अभिभाषण मगरा दौनें सदनें च धन्नबाद प्रस्ताह पेश कीता जाग, जेह्दे पर सदस्य चर्चा च हिस्सा लेंगन। 18मीं लोकसभा दा पैहला इजलास सोमवारें शुरू होआ हा ते राज्यसभा दा सत्र अज्जै थमां शुरू होग। कल ओम बिरला होर बी दूई बारी लगातार लोकसभा अध्यक्ष दे तौर पर चुनेआ गोआ हा। बीजेपी दे वरिष्ठ सांसद होरें गी ध्वनिमत कन्नै चुनेआ गोआ। विपक्ष नै कांग्रेस दे सांसद के.सुरेश होरें गी अपना मेदवार बनाए दा हा। चुनां मगरा प्रधानमंत्री नरेन्द्र मोदी, विरोधी धड़े दे नेता राहुल गांधीते पार्लिमानी मामले दे मंत्री किरन रिजिजू होर बिरला होरें गी अध्यक्ष दे आसन तोड़ी लेइयै गे। अपने संबोधन च बिरला होरें आखेआ जे संसदी कदरें ते लोकतांत्रिक रिवायतें गी समृद्ध बनाना उंदी प्राथमिकता होग। अध्यक्ष चुने जाने पर बिरला होरें गी मुबारकबाद दिंदे होई प्रधानमंत्री होरें आखेआ जे बिरला हुंदे दूई बारी चुने जाने पर इतिहास बनी गोआ ऐ।

विपक्ष दे नेता राहुल गांधी होरें बिरला होरें गी मुबारकबाद दित्ती ते आखेआ जे सदन लोकें दिएं आसैं—तांगें दी नुमायंदगी करदा ऐ।

<><><><><><>

## CBI-NEET

नीट पेपर लीक मामले दी जांच आस्तै सीबीआई दी इक टीम झारखंड दे हजारीबाग स्थित ओयसिस स्कूल पुज्जी। सीबीआई दे अधिकारिणं पेपर लीक कन्नै जुड़े दे बक्ख—बक्ख पैहलुएं पर प्रिंसिपल थमां पुच्छ—गिच्छ कीती। एहदे मगरा अग्गे दी जांच ते पुच्छ—पड़ताल आस्तै सीबीआई उनेंगी अपने कन्नै लेई गई। प्रिंसिपल नीट मतेयान आस्तै हजारीबाग दे स्कूलें च नीट मतेयान आस्तै तालमेल अधिकारी हे। सीबीआई दी टीम नै एसबीआई हजारीबाग दी शाखा दे अधिकारिणं थमां बी पुच्छ—पड़ताल कीती जित्थें प्रश्न पत्र रखे गेदे हे। बिहार दी आर्थिक अपराध इकाई ईओयू नै पैहले आखेआ हा जे पटना दे खेमनी चक प्ले स्कूल थमां आंशिक तौर पर फकोए दा प्रश्न पेपर जब्त कीता गेआ हा। एह राष्ट्रीय सतह पर मतेयान लैने आली अजेंसी एनटीए थमां हासल प्रश्न पत्रें कन्नै मेल खंदा ऐ। इस्सै प्रश्न पेपर दी श्रृंखला हजारीबाग दे कल्लू चौक स्थित ओयसिस स्कूल आले मतेयान केन्द्र पर भेजी गई ही।

<><><><><><>

## DRDO

श्रक्षा अनुसंधन ते विज्ञान संगठन डीआरडीओ नै कल नमीं दिल्ली च लोआए गेदे इक समारोह दरान दरम्यानी दूरी तगर मार करने आला माइक्रोवेव ओबक्यूरेंट शॉफ राकेट एमआर—एमओसीआर भारती नौसेना गी सौंपेआ। माइक्रोवेव ओबक्यूरेंट शॉफ इक खास तकनीक ऐ जिसी डीआरडीओ दी जोधपुर आली डिफेंस लैबाटरी च विकसित कीता गेआ ऐ। एह राकेट इक माइक्रोवेव ढाल बनांदा ऐ जे रडार दी खोजबीन गी घट्ट करी दिंदा ऐ। दरम्यानी दूरी दे शॉफ राकेट च खास किस्मै दे रेशें दा इस्तेमाल कीता गेदा ऐ। इस राकेट गी जिसलै अंतरिक्ष च छोड़ेआ जाग तां एह नजर नेई औने आले लौहके बददल बनांदा ऐ जेहड़े बड़े बड़डे इलाके च फैली जंदे न।

<><><><><><>

## Telecom Spectrum

मोबाइल सेवाएं दी निरंतरता ते विकास लेई दूर संचार सेवां प्रदान करने आलें दी नमीं सपैक्ट्रम जरूरतें गी पूरा करने ते खत्म होआ करदे लसेंमें गी परतियै नमां करने लेई आयोजित कीती गेदी सपैक्ट्रम दी निलामी कामयाबी कन्नै संपन्न होई गई ऐ। संचार मंत्रालय नै आखेआ ऐ जे सब्बे उपलब्ध सपैक्ट्रम निलामी लेई रखे गेदे हे। इस बारे दी निलामी च 900 मैगाहर्टज, 1800 मैगाहर्टज, 2100 मैगाहर्टज ते 2500 मैगाहर्टज बैंड च निलामी कीती गई। केन्द्री संचार मंत्री ज्योतिरादित्य सिंधिया होरें इक ब्यान च आखेआ ऐ जे सपैक्ट्रम दी निलामी 2024 इक पारदर्शी ते मजबूत बंड प्रक्रिया दा हिस्सा ही।



## Kejriwal

दिल्ली दी अदालतै दिल्ली दे मुख्यमंत्री अरविंद केजरीवाल होरें गी काले धन गी जायज बनाने सरबंधी मामले च त्रऊं दिनें लेई सीबीआई हिरासतै च भेजी दित्ता ऐ। एहदे शा पैहले राउस एवीन्यू अदालतै च पेश करने थमां पैहले सीबीआई नै उनेंगी गिरफ्तार कीता। एहदे कन्नै गै केजरीवाल होरें दिल्ली हाई कोर्ट आस्सेआ उंदी जमानत उप्पर रोक लाने सरबंधी फैसले खिलाफ सुप्रीम कोर्ट च दित्ती गेदी याचिका गी वापस लेई लैता। केजरीवाल होरें गी दिल्ली शराब घोटाले सरबंधी नीति च काले धनै गी जायज बनाने आले मामले च गिरफ्तार कीता गेदा ऐ।



## Telangana

तेलंगाना दी सरकार आस्सेआ राज्य दे त्रै बड्डे मैडिकल कालेजें च मूल ढांचा विकास लेई 200 करोड़ रपे जारी कीते जाने मगरा जूनियर डाक्टरें अपनी त्रऊं दिनें दी हड़ताल वापस लेई लैती ऐ। उनें सेहत मैहकमे दे बड्डे अधिकारिएं ते राज्य दे सेहत मंत्री सी.दामोदर राजा नरसिम्हा हुंदे कन्नै अपनी मंगें बरी चर्चा कीती जेहदे च गांधी मैडिकल कालेज, हैदराबाद च ओसमानिया मैडिकल कालेज ते वारांगल काकातिया मैडिकल कालेज च हास्टल दिएं इमारतें दा निर्माण करना शामिल ऐ।



## IMD

भारती मौसम विभाग नै अज्ज जम्मू कश्मीर, लद्दाख, गिलगित बाल्तीस्तान, मुजफ्फराबाद, हिमाचल प्रदेश, पंजाब, हरियाणा, चंडीगढ़, दिल्ली ते पच्छमी राजस्थान च दरम्याने दर्जे दी बरखा दी पेशगोई कीती ऐ। तोआई जम्मू च कल रातीं होई दी बरखा करी लोकें गी जबरदस्त गर्मी शा बिंद राहत थ्होई ऐ।



## Advani

बीजेपी दे वरिष्ठ नेता लाल कृष्ण आडवाणी होरें गी कल किश बमार होने मगरा जंदी रातीं एम्स च दाखल करोआया गेआ। एम्स दे अधिकारिएं आखेआ जे आडवाणी होर स्थिर न ते उंदा इलाज कीता जा'रदा ऐ।



## Doda Encounter

सुरक्षा बलें इक बड्डी कामयाबी हासल करदे होई डोडा जिले दे गंदोह थाहर सिन्नु आले जंगली इलाके च जैश-ए-मोहम्मद आतंकवादी गुट कन्नै सरबंधत रखने आले त्रै विदेशी आतंकवादिएं गी मारी मकाया ऐ। सुरक्षाबलें उंदे कब्जे थमां खरी मती गिनतरी च असला, बरूद ते होर दुआ विस्फोटक बरामद कीता ऐ। एहदे च 2 अमरीकी एम-4 कारबाइंस बी शामिल न। एह सफलता छत्तरगल्ला ते कोटा टॉप च 4 ते 12 जून गी सुरक्षाबलें ते आतंकवादिएं बश्कार होए दे टाकरे मगरा हासल होई। इस टाकरे च 7 सुरक्षाकर्मी घायल होई गे हे। पर आतंकवादी चुत्थुआं नस्सने च कामयाब होई गे हे। पर अभियान गंदो दे सिन्नु जंगली इलाके च आतंकवादिएं दी मजूदगी बारे थ्होई दी टकोहदी जानकारी मगरा चलाया गेआ। सेना, पुलस ते एसओजी आस्सेआ जंगल दी घेराबंदी कीती गेई ते इक ढोक च आतंकवादी दी गतिविधि गी दिक्खेआ। दौनें बश्कार टाकरा होआ। आतंकवादिएं एम4 कारबाइन, एके रैफल दा इस्तेमाल कीता ते सुरक्षाबलें पर ग्रनेड बी सुट्टे जेहदा सुरक्षाबलें आस्सेआ परता दित्ता गेआ ते टाकरा भखी पेआ। इस टाकरे च त्रै आतंकवादी मारे गे।

इस टाकरे च इक पुलस कर्मी घायल होआ जिसी अस्पताल पजाया गेआ ते ओहदी हालत स्थिर दस्सी जा'रदी ऐ।



## T-20 World Cup

मर्दे दे आईसीसी टी-20 विश्व कप दा दूआ सैमीफाइनल मैच अज्ज संजा गुयाना च भारत ते इंग्लैंड बश्कार खेड्डेआ जाग। भारतीय समें मताबक मैच रातीं 8 बजे शुरू होग। भारतीय टीम दा एंट बरोबर भखे दा ऐ ते एह्दे हौसले पूरी चाल्ली बुलंद न की जे प्रतियोगिता च उन्नै अजें तोड़ी इक्क बी मैच हारे दा नेई ऐ। गुयाना च मौसम पिछले दऊं दिने दा बदलोखड़ा ऐ ते शामी लै तेज बरखा दे असार बरोबर बने दे न, जेह्दे कारण होई सकदा ऐ जे मैच घट्ट ओवरें दा जा नेई फही खेड्डेआ गै नेई जाई सकै। तोआई अज्ज बडलै त्रिनीदाद दे ब्रायन लारा स्टेडियम च खेड्डे गेदे इस प्रतियोगिता दे पैहले सैमीफाइनल मैच दक्खन अफ्रीका नै अफगानिस्तान गी 7 विकटें कन्नै हराई दित्ता। पैहले बल्लेबाजी करदे होई अफगानिस्तान दी टी 11 ओवर ते 5 गेंदें च शड़े 56 रंज गै बनाई सकी। जेह्दे परते च दक्खन अफ्रीका नै 8 ओवरें ते 5 गेंदें च इक विकट दे नुकसान पर 60 रंज बनाइयै मैच अपने नां करी लैता। फाइनल मकाबला दक्खन अफ्रीका ते अज्ज शामी दुआ सैमीफाइनल जित्तने आली टीम बश्कार होग।

